

Directivas severas per la higiena dalla carn dalla selvaschina

Il venderdis ein ils catschadurs da Sursassiala vegni orientai a Mustér davart las pretensiuns legalas novas

DA HANS HUONDER / ANR

L'entschatta settember 2018 van novas directivas per la higiena dalla carn dalla selvaschina en vigur. La finamira da quellas ei d'adossar allas catschaduras ed als catschaduras dapli responsabladad per la carn dils animals ch'els han sittau. Carn dalla selvaschina ei in product natural d'emprema qualitat. Mo era ella sto vegnir tractada tenor ils criteris dalla higiena, oravontut sch'ella va el commerci. Il matg 2017 ei il niev dretg davart las victualias en Sviza ius en vigur. Quei dretg revidiu pretendia dapli transparenza e megliera protezion dalla populaziun en connex cun rescas per la sanadad. El regla denton era ils fatgs che pertuccan la higiena dalla carn dalla selvaschina. La finamira: Catschaduras e catschadurs duein surprender dapli responsabladad per la carn da lur animals sittai sco era contribuir all'informaziun che pertucca la cadeina dils products fatgs ord quella carn. Sin fundament da quellas midadas surordinadas han las instanzas cantunais revidiu il dretg. Sebasond sin quel sto scadin animal d'ungla sittau vegnir controllaus u dil catschadur, dil mazler ni entras ina persuna ufficiala egl avegnir. Ils animals ston vegnir marcai e documentai. Per orientar las catschaduras ed ils catschadurs en detagl davart las directivas novas organiseschan igl Uffeci per la segirtad dallas victualias e la sanadad dils animals dil Grischun ed igl Uffeci da catscha e pesca dil Grischun seras d'orientaziun publicas egl entir cantun. L'emprema ha giu liug il venderdis sera el Center sursilvan d'agricultura a Mustér/Salaplauna. Catschaduras e catschadurs da Sursassiala ein stai evidai a quella.

Claras directivas

Scadin animal selvadi cun unglia che vegn sittaus el Grischun egl avegnir ha da ve-



Els treis han orientau il venderdis sera ils catschadurs a Mustér: Il substitut dil veterinari cantunal Giohen Bearth, il veterinari regional Urs Probst ed il guardiaselvaschina Ueli Jörimann (da sen.).

FOTO H. HUONDER

gnir plumbaus. Las plumbas survegn la catschadura ni il catschadur tier la cumpra dalla patenta. «En sesez dat ei duas pusseivladads pil nez digl animal. Ina varianta ei ch'il catschadur nezegia sez igl animal. La secunda varianta ei che quel va el commerci, vul dir vegn vendius per exemplu ad in mazler. Lu sto igl animal vegnir documentaus cun in formular ufficial», di il veterinari Urs Probst. Ensemble cugl animal pertuccau ha il formular allura da vegnir surdaus al liug da destin. Il catschadur ha da confirmar sil formular che la preda seigi en uorden, denter auter ch'ils organs havevien neginas anomalitads. Ha el tonaton in animal cun dubis ni clars mussaments per exem-

pel d'ina malsogna sco era in schliet siet sto el indicar quei sil formular. «En in tal cass ha la selvaschina da vegnir controllada dil veterinari», di Probst. Aschilunsch che quel dat la confirma ch'igl animal sappi vegnir nezegiaus vegn quel elavuraus. «Ei sa esser ch'in animal ei buca duvrabels. Lu sto el vegnir dismiss. Ei sa era esser ch'ins sa nezegiar mo parts da quel. Quei mument ch'il veterinari ha controllau igl animal e quel ei buca gudibels sto el vegnir dismiss. Il catschadur sa lu buca pli sedecider da nezegiar quel sez», puntuescha il substitut dil veterinari cantunal Giohen Bearth. Il formular che ha da vegnir emplenius ora sto cuntener in tschuppel informaziuns. Denter

auter cura ch'igl animal ei vegnius sittaus e cura ch'el ei vegnius sventraus, ni era sch'igl ei stau necessari d'encurir el e con ditg.

Negin cuors obligatori

Catschaduras e catschadurs che han fatg ils examens da catscha entochen uonn ston buca frequentar cuors per la higiena dalla carn. Tenor Bearth vegn ei tonaton purschiu cuors voluntaris. Candidatas e candidats per la patenta da catscha han egl avegnir automaticamein da sefaschentlar da quei sectur. Per mintga animal che sto vegnir controllaus adossesta il veterinari ina taxa dad otg francs. Leutier vegn ina taxa da 20 francs per min-

tga viseta ella mazlaria. «Sch'el sa controlar plirs animals il medem mument sche sa la summa da 20 francs secapescha vegnir repartida sin quei diember d'animals», di Bearth. Il mazler vegn probablamente ad adossar quels cuosts al catschadur. Catschaduras e catschadurs ch'elavureschan sez la selvaschina a casa per agen diever astgan buca vender carn, cun in'exceptiun, numnadamein sche quei succeda en ina localitat lubida dalla controlla da victualias. Pusseivel eis ei denton da vender in'entira selvaschina per exemplu ad in consument final ni in'ustria. Mo era lu sto il catschadur confirmar cul formular ch'igl animal eri sauns e seigi vegnius sittaus conform als criteris dalla catscha. «Pertuccont la higiena dalla carn vegnin nus a tolerar nuot. Sche nus sentin ch'in catschadur fa buca l'obligaziun vegnir nus ad intervenir e denter auter pretender dad el ch'el fetschi il cuors», puntuescha Bearth. Tenor il substitut dil veterinari cantunal sa il catschadur era delegar la controlla ad in camerat da catscha: «Ei sa esser ch'ins ha en grupp da catscha ina persuna fett qualificada che sa surprender quell'incumbensa. Quei ei secapescha era pusseivel.» Dils menaschis d'elavrazion da carn ch'astgan recepir la selvaschina che sto vegnir controllada exista dil reminent ina gliesta. Era ils auters documents ein da cattar sin la homepage www.alt.gr.ch.

Toleranza igl emprem onn

Sco quei ch'il guardiaselvaschina Ueli Jörimann ha detg il venderdis vegn la survigilanza a tolerar igl emprem onn entignas negligentschas en connex cun las directivas novas, sco per exemplu la documentaziun dalla numera dalla plumba ella gliesta da catscha. Silsunter vegnan tales negligentschas buca toleradas pli. La survigilanza da catscha emprovi da sustener ed informar las catschaduras ed ils catschadurs tenor sias pusseivladads.